

孟浩然詩全集(唐)

【生平簡介】

孟浩然（六八九—七四零），湖北襄陽人。是唐代一位不甘隱居，卻以隱居終老的詩人。壯年時曾往吳越漫遊，後又赴長安謀求官職，但以「當路無人」，只好還歸故園。開元二十八年（七四零）詩人王昌齡遊襄陽，和他相聚甚歡，但此時孟浩然背上正生毒瘡，據說就是因為「食鮮疾動」，終於病故，年五十二歲。

孟浩然的一生，徘徊於求官與歸隱的矛盾之中，直到碰了釘子才了結了求官的願望。他雖然隱居林下，但仍與當時達官顯宦如張九齡等有往還，和詩人王維、李白、王昌齡也有酬唱。

孟浩然的詩已擺脫了初唐應制，詠物的狹窄境界，更多地抒寫了個人的懷抱，給開元詩壇帶來了新鮮氣息，並得到時人的傾慕。李白稱頌他「高山安可仰，徒此揖清芬」，杜甫禮贊他「清詩句句盡堪傳」。可見他在當時即享有盛名。他死後不到十年，詩集便兩經編定，並送上「秘府」保存。現有《孟浩然集》。

「從張丞相游南紀城獵，戲贈裴迪張參軍」孟浩然
從禽非吾樂，不好云夢田。歲暮登城望，偏令鄉思懸。公卿有幾幾，車騎何翩翩。
世祿金張貴，官曹幕府賢。

順時行殺氣，飛刃爭割鮮。十裏屈賓館，征聲匝妓筵。高標回落日，平楚散芳煙。
何意狂歌客，從公亦在旃。

「登江中孤嶼，贈白云先生王迥」孟浩然
悠悠清江水，水落沙嶼出。回潭石下深，綠筱岸傍密。鮫人潛不見，漁父歌自逸。
憶與君別時，泛舟如昨日。夕陽開返照，中坐興非一。南望鹿門山，歸來恨如失。

「晚春臥病寄張八」孟浩然
南陌春將晚，北窗猶臥病。林園久不遊，草木一何盛。狹逕花障迷，閒庭竹掃淨。
翠羽戲蘭苕，頰鱗動荷柄。

念我平生好，江鄉遠從政。云山阻夢思，衾枕勞歌詠。歌詠復何為，同心恨別離。
世途皆自媚，流俗寡相知。

賈誼才空逸，安仁鬢欲絲。遙情每東注，奔晷復西馳。常恐填溝壑，無由振羽儀。

窮通若有命，欲向論中推。

「秋登蘭山寄張五」孟浩然

北山白云裏，隱者自怡悅。相望試登高，心飛逐鳥滅。愁因薄暮起，興是清秋發。

時見歸村人，沙行渡頭歇。天邊樹若薺，江畔舟如月。何當載酒來，共醉重陽節。

「入峽寄弟」孟浩然

吾昔與爾輩，讀書常閉門。未嘗冒湍險，豈顧垂堂言。自此曆江湖，辛勤難具論。往來行旅弊，開鑿禹功存。

壁立千峰峻，湍流萬壑奔。我來凡幾宿，無夕不聞猿。浦上搖歸戀，舟中失夢魂。淚沾明月峽，心斷鵲鴿原。

離閩星難聚，秋深露已繁。因君下南楚，書此示鄉園。

「湖中旅泊，寄閩九司戶防」孟浩然

桂水通百越，扁舟期曉發。荊云蔽三巴，夕望不見家。襄王夢行雨，才子謫長沙。長沙饒瘴癘，胡為苦留滯。

久別思款顏，承歡懷接袂。接袂杳無由，徒增旅泊愁。清猿不可聽，沿月下湘流。

「大堤行寄萬七」孟浩然

堤行樂處，車馬相馳突。歲歲春草生，踏青二三月。王孫挾珠彈，游女矜羅襪。攜手今莫同，江花為誰發。

「仲夏歸漢南園，寄京邑耆舊」孟浩然

嘗讀高士傳，最嘉陶征君。日耽田園趣，自謂羲皇人。予復何為者，棲棲徒問津。中年廢丘壑，上國旅風塵。

忠欲事明主，孝思侍老親。歸來當炎夏，耕稼不及春。扇枕北窗下，采芝南澗濱。因聲謝同列，吾慕潁陽真。

「題云門山，寄越府包戶曹、徐起居」孟浩然

我行適諸越，夢寐懷所歡。久負獨往願，今來恣遊盤。台嶺踐磴石，耶溪溯林湍。舍舟入香界，登閣憩旃檀。

晴山秦望近，春水鏡湖寬。遠懷佇應接，卑位徒勞安。白云日夕滯，滄海去來觀。

故國眇天末，良朋在朝端。

遲爾同攜手，何時方掛冠。

「宿揚子津，寄潤州長山劉隱士」孟浩然

所思在建業，欲往大江深。日夕望京口，煙波愁我心。心馳茅山洞，目極楓樹林。不見少微星，星霜勞夜吟。

「書懷貽京邑同好」孟浩然

維先自鄒魯，家世重儒風。詩禮襲遺訓，趨庭沾末躬。晝夜常自強，詞翰頗亦工。三十既成立，嗟籲命不通。

慈親向羸老，喜懼在深哀。甘脆朝不足，簞瓢夕屢空。執鞭慕夫子，捧檄懷毛公。感激遂彈冠，安能守固窮。

當途訴知己，投刺匪求蒙。秦楚邈離異，翻飛何日同。

「還山貽湛法師」孟浩然

幼聞無生理，常欲觀此身。心跡罕兼遂，崎嶇多在塵。晚途歸舊壑，偶與支公鄰。導以微妙法，結為清淨因。

煩惱業頓舍，山林情轉殷。朝來問疑義，夕話得清真。墨妙稱古絕，詞華驚世人。禪房閉虛靜，花藥連冬春。

平石藉琴硯，落泉灑衣巾。欲知冥滅意，朝夕海鷗馴。

「夏日南亭懷辛大」孟浩然

山光忽西落，池月漸東上。散發乘夕涼，開軒臥閑敞。荷風送香氣，

竹露滴清響。欲取鳴琴彈，恨無知音賞。感此懷故人，中宵勞夢想。

「秋宵月下有懷」孟浩然

秋空明月懸，光彩露沾濕。驚鵲棲未定，飛螢捲簾入。庭槐寒影疏，鄰杵夜聲急。佳期曠何許，望望空佇立。

「將適天臺，留別臨安李主簿」孟浩然

枳棘君尚棲，匏瓜吾豈系。念離當夏首，漂泊指炎裔。江海非墮游，田園失歸計。定山既早發，漁浦亦宵濟。

泛泛隨波瀾，行行任艫柁。故林日已遠，群木坐成翳。羽人在丹丘，吾亦從此逝。

「送丁大鳳進士赴舉，呈張九齡」孟浩然

吾觀鷓鴣賦，君負王佐才。惜無金張援，十上空歸來。棄置鄉園老，翻飛羽翼摧。故人今在位，岐路莫遲回。

「送吳悅游韶陽」孟浩然

五色憐鳳雛，南飛適鷓鴣。楚人不相識，何處求椅梧。去去日千里，茫茫天一隅。安能與斥鷃，決起但槍榆。

「適越留別譙縣張主簿、申屠少府」孟浩然

朝乘汴河流，夕次譙縣界。幸值西風吹，得與故人會。君學梅福隱，余從伯鸞邁。別後能相思，浮云在吳會。

「送陳七赴西軍」孟浩然

吾觀非常者，碌碌在目前。君負鴻鵠志，蹉跎書劍年。一聞邊烽動，萬里忽爭先。余亦赴京國，何當獻凱還。

「送從弟邕下第後尋會稽」孟浩然

疾風吹征帆，倏爾向空沒。千里在俄頃，三江坐超忽。向來共歡娛，日夕成楚越。落羽更分飛，誰能不驚骨。

「送辛大之鄂渚不及」孟浩然

送君不相見，日暮獨愁緒。江上空裴回，天邊迷處所。郡邑經樊鄧，山河入嵩汝。蒲輪去漸遙，石徑徒延佇。

「江上別流人」孟浩然

以我越鄉客，逢君謫居者。分飛黃鶴樓，流落蒼梧野。驛使乘云去，征帆沿溜下。不知從此分，還袂何時把。

「宴包二融宅」孟浩然

閒居枕清洛，左右接大野。門庭無雜賓，車轍多長者。是時方盛夏，風物自瀟灑。五日休沐歸，相攜竹林下。開襟成歡趣，對酒不能罷。煙暝棲鳥迷，余將歸白社。

「與王昌齡宴王道士房」孟浩然

歸來臥青山，常夢遊清都。漆園有傲吏，惠好在招呼。書幌神仙籙，畫屏山海圖。

酌霞復對此，宛似入蓬壺。

「襄陽公宅飲」孟浩然

窈窕夕陽佳，豐茸春色好。欲覓淹留處，無過狹斜道。綺席捲龍須，香杯浮瑪瑙。北林積修樹，南池生別島。

手撥金翠花，心迷玉紅草。談笑光六義，發論明三倒。座非陳子驚，門還魏公掃。榮辱應無間，歡娛當共保。

「尋香山湛上人」孟浩然

朝遊訪名山，山遠在空翠。氛氳互百里，日入行始至。杖策尋故人，解鞭暫停騎。石門殊豁險，篁徑轉森邃。

法侶欣相逢，清談曉不寐。平生慕真隱，累日探奇異。野老朝入田，山僧暮歸寺。松泉多逸響，苔壁饒古意。

谷口聞鐘聲，林端識香氣。願言投此山，身世兩相棄。

「云門寺西六七裏，聞符公蘭若最幽，與薛八同往」孟浩然

謂予獨迷方，逢子亦在野。結交指松柏，問法尋蘭若。小溪劣容舟，怪石屢驚馬。所居最幽絕，所住皆靜者。

云簇興座隅，天空落階下。上人亦何聞，塵念都已舍。四禪合真如，一切是虛假。願承甘露潤，喜得惠風灑。

依止托山門，誰能效丘也。

「宿天臺桐柏觀」孟浩然

海行信風帆，夕宿逗云島。緬尋滄洲趣，近愛赤城好。捫蘿亦踐苔，輟棹恣探討。息陰憩桐柏，采秀弄芝草。

鶴唳清露垂，雞鳴信潮早。願言解纓紱，從此去煩惱。高步凌四明，玄蹤得三老。紛吾遠遊意，學彼長生道。

日夕望三山，云濤空浩浩。

「峴潭作」孟浩然

石潭傍隈隩，沙岸曉夤緣。試垂竹竿釣，果得槎頭鱸。美人騎金錯，纖手膾紅鮮。

因謝陸內史，尊羹何足傳。

「題終南翠微寺空上人房」孟浩然

翠微終南裏，雨後宜返照。閉關久沈冥，杖策一登眺。遂造幽人室，始知靜者妙。儒道雖異門，雲林頗同調。

兩心相喜得，畢景共談笑。暝還高窗眠，時見遠山燒。緬懷赤城標，更憶臨海嶠。風泉有清音，何必蘇門嘯。

「初春漢中漾舟」孟浩然

羊公峴山下，神女漢皋曲。雪罷冰復開，春潭千丈綠。輕舟恣來往，探玩無厭足。波影搖妓釵，沙光逐人目。傾杯魚鳥醉，聯句鶯花續。良會難再逢，日入須秉燭。

「宿業師山房，期丁大不至」孟浩然

夕陽度西嶺，群壑條已暝。松月生夜涼，風泉滿清聽。樵人歸欲盡，煙鳥棲初定。之子期宿來，孤琴候蘿徑。

「耶溪泛舟」孟浩然

落景餘清輝，輕橈弄溪渚。澄明愛水物，臨泛何容與。白首垂釣翁，新妝浣紗女。相看似相識，脈脈不得語。

「彭蠡湖中望廬山」孟浩然

太虛生月暈，舟子知天風。掛席候明發，眇漫平湖中。中流見匡阜，勢壓九江雄。黯黯容霽色，崢嶸當曉空。

香爐初上日，瀑布噴成虹。久欲追尚子，況茲懷遠公。我來限於役，未暇息微躬。淮海途將半，星霜歲欲窮。

寄言岩棲者，畢趣當來同。

「登鹿門山」孟浩然

清曉因興來，乘流越江峴。沙禽近方識，浦樹遙莫辨。漸至鹿門山，山明翠微淺。岩潭多屈曲，舟楫屢回轉。

昔聞龐德公，采藥遂不返。金澗餌芝朮，石床臥苔蘚。紛吾感耆舊，結攬事攀踐。隱跡今尚存，高風邈已遠。

白云何時去，丹桂空偃蹇。探討意未窮，回艇夕陽晚。

「游明禪師西山蘭若」孟浩然

西山多奇狀，秀出倚前楹。停午收彩翠，夕陽照分明。吾師住其下，禪坐證無生。

結廬就嵌窟，剪苔通往行。談空對樵叟，授法與山精。日暮方辭去，田園歸冶城。

「登望楚山最高頂」孟浩然

山水觀形勝，襄陽美會稽。最高唯望楚，曾未一攀躋。石壁疑削成，眾山比全低。

晴明試登陟，目極無端倪。云夢掌中小，武陵花處迷。暝還歸騎下，蘿月映深溪。

「疾愈過龍泉寺精舍，呈易、業二公」孟浩然

停午聞山鐘，起行散愁疾。尋林采芝去，轉穀松翠密。傍見精舍開，長廊飯僧畢。石渠流雪水，

金子耀霜橘。竹房思舊遊，過憩終永日。入洞窺石髓，傍崖采蜂蜜。日暮辭遠公，虎溪相送出。

「萬山潭作」孟浩然

垂釣坐磐石，水清心亦閑。魚行潭樹下，猿掛島藤間。游女昔解佩，傳聞於此山。求之不可得，沿月棹歌還。

「與黃侍禦北津泛舟」孟浩然

津無蛟龍患，日夕常安流。本欲避驄馬，何如同鷁舟。豈伊今日幸，曾是昔年遊。莫奏琴中鶴，

且隨波上鷗。堤緣九裏郭，山面百城樓。自顧躬耕者，才非管樂儔。聞君薦草澤，從此泛滄洲。

「洗然弟竹亭」孟浩然

吾與二三子，平生結交深。俱懷鴻鵠志，昔有鷓鴣心。逸氣假毫翰，清風在竹林。達是酒中趣，琴上偶然音。

「山中逢道士云公」孟浩然

春餘草木繁，耕種滿田園。酌酒聊自勸，農夫安與言。忽聞荊山子，時出桃花源。采樵過北穀，賣藥來西村。

村煙日云夕，榛路有歸客。杖策前相逢，依然是疇昔。邂逅歡覲止，殷勤敘離隔。

調予搏扶桑，輕舉振六翮。

奈何偶昌運，獨見遺草澤。既笑接輿狂，仍憐孔丘厄。物情趨勢利，吾道貴閑寂。偃息西山下，門庭罕人跡。

何時還清溪，從爾煉丹液。

「越中逢天臺太乙子」孟浩然

仙穴逢羽人，停鱸向前拜。問余涉風水，何處遠行邁。登陸尋天臺，順流下吳會。茲山夙所尚，安得問靈怪。

上逼青天高，俯臨滄海大。雞鳴見日出，常覲仙人旆。往來赤城中，逍遙白云外。莓苔異人間，瀑布當空界。

福庭長自然，華頂舊稱最。永此從之游，何當濟所屆。

「家園臥疾，畢太祝曜見尋」孟浩然

伏枕舊遊曠，笙簧勞夢思。平生重交結，迨此令人疑。冰室無暖氣，炎云空赫曦。隙駒不暫駐，日聽涼蟬悲。

壯圖哀未立，斑白恨吾衰。夫子自南楚，緬懷嵩汝期。顧予衡茅下，兼致稟物資。脫分趨庭禮，殷勤伐木詩。

脫君車前鞅，設我園中葵。鬥酒須寒興，明朝難重持。

「白云先生王迴見訪」孟浩然

閑歸日無事，云臥晝不起。有客款柴扉，白云巢居子。居閑好芝朮，采藥來城市。家在鹿門山，常游澗澤水。手持白羽扇，腳步青芒履。聞道鶴書征，臨流還洗耳。

「田園作」孟浩然

弊廬隔塵喧，惟先養恬素。卜鄰近三徑，植果盈千樹。粵余任推遷，三十猶未遇。

書劍時將晚，丘園日已暮。晨興自多懷，晝坐常寡悟。沖天羨鴻鵠，爭食羞雞鶩。

望斷金馬門，勞歌采樵路。鄉曲無知己，朝端乏親故。誰能為揚雄，一薦甘泉賦。

「采樵作」孟浩然

采樵人深山，山深樹重疊。橋崩臥槎擁，路險垂藤接。日落伴將稀，山風拂蘿衣。

長歌負輕策，平野望煙歸。

「自潯陽泛舟經明海」孟浩然

大江分九流，淼淼成水鄉。舟子乘利涉，往來至潯陽。因之泛五湖，流浪經三湘。觀濤壯枚發，吊屈痛沉湘。魏闕心恒在，金門詔不忘。遙憐上林雁，冰泮也回翔。

「早發漁浦潭」孟浩然

東旭早光芒，渚禽已驚聒。臥聞漁浦口，橈聲暗相撥。日出氣象分，始知江湖闊。美人常晏起，照影弄流沫。飲水畏驚猿，祭魚時見獺。舟行自無悶，況值晴景豁。

「經七裏灘」孟浩然

予奉垂堂誡，千金非所輕。為多山水樂，頻作泛舟行。五嶽追向子，三湘吊屈平。湖經洞庭闊，江入新安清。

複聞嚴陵瀨，乃在茲湍路。疊障數百里，沿洄非一趣。彩翠相氛氳，別流亂奔注。釣磯平可坐，苔磴滑難步。

猿飲石下潭，鳥還日邊樹。觀奇恨來晚，倚棹惜將暮。揮手弄潺湲，從茲洗塵慮。

「歲暮海上作」孟浩然

仲尼既云歿，余亦浮於海。昏見斗柄回，方知歲星改。虛舟任所適，垂釣非有待。為問乘槎人，滄洲復誰在。

「南歸阻雪」孟浩然

我行滯宛許，日夕望京豫。曠野莽茫茫，鄉山在何處。孤煙村際起，歸雁天邊去。

積雪覆平皋，饑鷹捉寒兔。少年弄文墨，屬意在章句。十上恥還家，裴回守歸路。

「聽鄭五悵彈琴」孟浩然

阮籍推名飲，清風滿竹林。半酣下衫袖，拂拭龍唇琴。一杯彈一曲，不覺夕陽沉。予意在山水，聞之諧夙心。

「同張明府清鏡歎」孟浩然

妾有盤龍鏡，清光常晝發。自從生塵埃，有若霧中月。愁來試取照，坐歎生白髮。寄語邊塞人，如何久離別。

「庭橘」孟浩然

明發覽群物，萬木何陰森。凝霜漸漸水，庭橘似懸金。女伴爭攀摘，摘窺礙葉深。

並生憐共蒂，相示感同心。骨刺紅羅被，香黏翠羽簪。擎來玉盤裏，全勝在幽林。

「早梅」孟浩然

園中有早梅，年例犯寒開。少婦曾攀折，將歸插鏡臺。猶言看不足，更欲剪刀裁。

「清明即事」孟浩然

帝裏重清明，人心自愁思。車聲上路合，柳色東城翠。花落草齊生，鶯飛蝶雙戲。空堂坐相憶，酌茗聊代醉。

「和盧明府送鄭十三還京兼寄之什」孟浩然

昔時風景登臨地，今日衣冠送別筵。醉坐自傾彭澤酒，思歸長望白云天。

洞庭一葉驚秋早，瀟落空嗟滯江島。寄語朝廷當世人，何時重見長安道。

「高陽池送朱二」孟浩然

當昔襄陽雄盛時，山公常醉習家池。池邊釣女日相隨，妝成照影競來窺。澄波澹澹芙蓉發，綠岸毵毵楊柳垂。

一朝物變人亦非，四面荒涼人徑稀。意氣豪華何處在，空餘草露濕羅衣。此地朝來餞行者，翻向此中牧征馬。

征馬分飛日漸斜，見此空為人所嗟。殷勤為訪桃源路，予亦歸來松子家。

「鸚鵡洲送王九之江左」孟浩然

昔登江上黃鶴樓，遙愛江中鸚鵡洲。洲勢逶迤繞碧流，鴛鴦鸚鵡滿灘頭。灘頭日落沙磧長，金沙熠熠動颿光。

舟人牽錦纜，浣女結羅裳。月明全見蘆花白，風起遙聞杜若香。君行采采莫相忘。

「送王七尉松滋，得陽臺云」孟浩然

君不見巫山神女作行云，霏紅遶翠曉氛氲。嬋娟流入楚王夢，倏忽還隨零雨分。

空中飛去復飛來，朝朝暮暮下陽臺。愁君此去為仙尉，便逐行云去不回。

「夜歸鹿門山歌」孟浩然

山寺鐘鳴晝已昏，漁梁渡頭爭渡喧。人隨沙路向江村，余亦乘舟歸鹿門。

鹿門月照開煙樹，忽到龐公棲隱處。岩扉松徑長寂寥，惟有幽人夜來去。

「長樂宮」孟浩然

秦城舊來稱窈窕，漢家更衣應不少。紅粉邀君在何處，青樓苦夜長難曉。

長樂宮中鐘暗來，可憐歌舞慣相催。歡娛此事今寂寞，惟有年年陵樹哀。

「示孟郊」孟浩然

蔓草蔽極野，蘭芝結孤根。眾音何其繁，伯牙獨不喧。當時高深意，

舉世無能分。鐘期一見知，山水千秋聞。爾其保靜節，薄俗徒云云。

「和張丞相春朝對雪」孟浩然

迎氣當春至，承恩喜雪來。潤從河漢下，花遍豔陽開。不睹豐年瑞，焉知燮理才。
撒鹽如可擬，願糝和羹梅。

「和張明府登鹿門作」孟浩然

忽示登高作，能寬旅寓情。弦歌既多暇，山水思微清。草得風光動，虹因雨氣成。
謬承巴里和，非敢應同聲。

「和張二自穰縣還途中遇雪」孟浩然

風吹沙海雪，漸作柳園春。宛轉隨香騎，輕盈伴玉人。歌疑郢中客，態比洛川神。
今日南歸楚，雙飛似入秦。

「和賈主簿弁九日登峴山」孟浩然

楚萬重陽日，群公賞宴來。共乘休沐暇，同醉菊花杯。逸思高秋發，歡情落景催。
國人鹹寡和，遙愧洛陽才。

「望洞庭湖，贈張丞相（一作臨洞庭）」孟浩然

八月湖水平，涵虛混太清。氣蒸云夢澤，波撼岳陽城。欲濟無舟楫，端居恥聖明。
坐觀垂釣者，空有羨魚情。

「贈道士參寥」孟浩然

蜀琴久不弄，玉匣細塵生。絲脆弦將斷，金徽色尚榮。知音徒自惜，聾俗本相輕。
不遇鐘期聽，誰知鸞鳳聲。

「京還贈張（一作王）維」孟浩然

拂衣何處去，高枕南山南。欲徇五門祿，其如七不堪。早朝非晚起，束帶異抽簪。因向智者說，游魚思舊潭。

「題李十四莊，兼贈綦毋校書」孟浩然

聞君息陰地，東郭柳林間。左右灑澗水，門庭緱氏山。抱琴來取醉，垂釣坐乘閑。歸客莫相待，尋源殊未還。

「九日龍沙作，寄劉大春虛」孟浩然

龍沙豫章北，九日掛帆過。風俗因時見，湖山發興多。客中誰送酒，棹裏自成歌。歌竟乘流去，滔滔任夕波。

「寄趙正字」孟浩然

正字芸香閣，幽人竹素園。經過宛如昨，歸臥寂無喧。高鳥能擇木，羝羊漫觸藩。物情今已見，從此願忘言。

「洞庭湖寄閻九」孟浩然

洞庭秋正闊，餘欲泛歸船。莫辨荊吳地，唯餘水共天。渺瀰江樹沒，合遝海潮連。遲爾為舟楫，相將濟巨川。

「秦中感秋，寄遠上人（一作崔國輔詩）」孟浩然

一丘常欲臥，三徑苦無資。北土非吾願，東林懷我師。黃金然桂盡，壯志逐年衰。日夕涼風至，聞蟬但益悲。

「宿永嘉江，寄山陰崔少府國輔」孟浩然

我行窮水國，君使入京華。相去日千里，孤帆天一涯。臥聞海潮至，起視江月斜。借問同舟客，何時到永嘉。

「上巳洛中寄王九迴（一作王迴十九）」孟浩然

卜洛成周地，浮杯上巳筵。鬥雞寒食下，走馬射堂前。垂柳金堤合，平沙翠幕連。不知王逸少，何處會群賢。

「聞裴侍禦拙自襄州司戶除豫州司戶，因以投寄」孟浩然

故人荊府掾，尚有柏台威。移職自樊衍，芳聲聞帝畿。昔余臥林巷，載酒過柴扉。松菊無時賞，鄉園欲懶歸。

「江上寄山陰崔少府國輔」孟浩然

春堤楊柳發，憶與故人期。草木本無意，榮枯自有時。山陰定遠近，江上日相思。不及蘭亭會，空吟祓禊詩。

「夜泊廬江，聞故人在東寺，以詩寄之」孟浩然

江路經廬阜，松門入虎溪。聞君尋寂樂，清夜宿招提。石鏡山精怯，禪枝佈鷓棲。一燈如悟道，為照客心迷。

「宿桐廬江，寄廣陵舊游」孟浩然

山暝聞猿愁，滄江急夜流。風鳴兩岸葉，月照一孤舟。建德非吾土，維揚憶舊遊。還將兩行淚，遙寄海西頭。

「南還舟中寄袁太祝」孟浩然

沿溯非便習，風波厭苦辛。忽聞遷穀鳥，來報五陵春。嶺北回征帆，巴東問故人。桃源何處是，遊子正迷津。

「東陂遇雨，率爾貽謝南池」孟浩然

田家春事起，丁壯就東陂。殷殷雷聲作，森森雨足垂。海虹晴始見，河柳潤初移。予意在耕鑿，因君問土宜。

「行至汝墳寄盧征君」孟浩然

行乏憩予駕，依然見汝墳。洛川方罷雪，嵩嶂有殘云。曳曳半空裏，明明五色分。聊題一時興，因寄盧征君。

「寄天臺道士」孟浩然

海上求仙客，三山望幾時。焚香宿華頂，裊露采靈芝。屢躡莓苔滑，將尋汗漫期。倘因松子去，長與世人辭。

「唐城館中早發，寄楊使君」孟浩然

犯霜驅曉駕，數裏見唐城。旅館歸心逼，荒村客思盈。訪人留後信，策蹇赴前程。欲識離魂斷，長空聽雁聲。

「澗南即事，貽皎上人」孟浩然

弊廬在郭外，素產惟田園。左右林野曠，不聞朝市喧。釣竿垂北澗，樵唱入南軒。書取幽棲事，將尋靜者論。

「重酬李少府見贈」孟浩然

養疾衡簷下，由來浩氣真。五行將禁火，十步任尋春。致敬惟桑梓，邀歡即主人。回看後凋色，青翠有松筠。

「九日懷襄陽」孟浩然

去國似如昨，倏然經杪秋。峴山不可見，風景令人愁。誰采籬下菊，應閑池上樓。
宜城多美酒，歸與葛強遊。

「初出關旅亭夜坐，懷王大校書」孟浩然
向夕槐煙起，蔥蘢池館曛。客中無偶坐，關外惜離群。燭至螢光滅，荷枯雨滴聞。
永懷芸閣友，寂寞滯揚云。

「人日登南陽驛門亭子，懷漢川諸友」孟浩然
朝來登陟處，不似豔陽時。異縣殊風物，羈懷多所思。剪花驚歲早，看柳訝春遲。
未有南飛雁，裁書欲寄誰。

「早寒江上有懷（一作江上思歸）」孟浩然
木落雁南度，北風江上寒。我家襄水上，遙隔楚雲端。鄉淚客中盡，孤帆天際看。
迷津欲有問，平海夕漫漫。

「閑園懷蘇子」孟浩然
林園雖少事，幽獨自多違。向夕開簾坐，庭陰落景微。鳥過煙樹宿，螢傍水軒飛。
感念同懷子，京華去不歸。

「同盧明府餞張郎中除義王府司馬，海園作」孟浩然
上國山河列，賢王邸第開。故人分職去，潘令寵行來。冠蓋趨梁苑，江湘失楚材。
豫愁軒騎動，賓客散池台。

「送張子容進士赴舉」孟浩然
夕曛山照滅，送客出柴門。惆悵野中別，殷勤岐路言。茂林予偃息，喬木爾飛翻。
無使穀風謫，須令友道存。

「送張參明經舉，兼向涇州覲省」孟浩然
十五彩衣年，承歡慈母前。孝廉因歲貢，懷橘向秦川。四座推文舉，中郎許仲宣。
泛舟江上別，誰不仰神仙。

「送張祥之房陵」孟浩然
我家南渡頭，慣習野人舟。日夕弄清淺，林湍逆上流。山河據形勝，天地生豪酋。
君意在利往，知音期自投。

「送吳宣從事（一作送蘇六從軍）」孟浩然
才有幕中士，甯無塞上勳。漢兵將滅虜，王粲始從軍。旌旆邊庭去，山川地脈分。
平生一七首，感激贈夫君。

「送桓子之郢成禮」孟浩然

聞君馳彩騎，躡蹠指南荆。為結潘楊好，言過鄢郢城。標梅詩有贈，羔雁禮將行。今夜神仙女，應來感夢情。

「留別王侍禦維」孟浩然

寂寂竟何待，朝朝空自歸。欲尋芳草去，惜與故人違。當路誰相假，知音世所稀。只應守索寞，還掩故園扉。

「早春潤州送從弟還鄉」孟浩然

兄弟游吳國，庭闈戀楚關。已多新歲感，更饒白眉還。歸泛西江水，離筵北固山。鄉園欲有贈，梅柳著先攀。

「峴山餞房琯、崔宗之」孟浩然

貴賤平生隔，軒車是日來。青陽一觀止，云路豁然開。祖道衣冠列，分亭驛騎催。方期九日聚，還待二星回。

「送謝錄事之越」孟浩然

清旦江天迥，涼風西北吹。白云向吳會，征帆亦相隨。想到耶溪日，應探禹穴奇。仙書倘相示，予在此山陲。

「洛中送奚三還揚州」孟浩然

水國無邊際，舟行共使風。羨君從此去，朝夕見鄉中。予亦離家久，南歸恨不同。音書若有問，江上會相逢。

「送告八從軍」孟浩然

男兒一片氣，何必五車書。好勇方過我，多才便起予。運籌將入幕，養拙就閒居。正待功名遂，從君繼兩疏。

「送元公之鄂渚，尋觀主張驂鸞」孟浩然

桃花春水漲，之子忽乘流。峴首辭蛟浦，江中問鶴樓。贈君青竹杖，送爾白蘋洲。應是神仙子，相期汗漫遊。

「送王五昆季省覲」孟浩然

公子戀庭闈，勞歌涉海涯。水乘舟楫去，親望老萊歸。斜日催烏鳥，清江照彩衣。平生急難意，遙仰鵲鴿飛。

「送崔暹」孟浩然

片玉來誇楚，治中作主人。江山增潤色，詞賦動陽春。別館當虛敞，離情任吐伸。因聲兩京舊，誰念臥漳濱。

「送盧少府使入秦」孟浩然

楚關望秦國，相去千里餘。州縣勤王事，山河轉使車。祖筵江上列，離恨別前書。願及芳年賞，嬌鶯二月初。

「送袁十嶺南尋弟」孟浩然

早聞牛渚詠，今見鵝鶩心。羽翼嗟零落，悲鳴別故林。蒼梧白云遠，煙水洞庭深。萬里獨飛去，南風遲爾音。

「永嘉別張子容」孟浩然

舊國余歸楚，新年子北征。掛帆愁海路，分手戀朋情。日夕故園意，汀洲春草生。何時一杯酒，重與季鷹傾。

「東京留別諸公（一題作京還別新豐諸友）」孟浩然

吾道味所適，驅車還向東。主人開舊館，留客醉新豐。樹繞溫泉綠，塵遮晚日紅。拂衣從此去，高步躡華嵩。

「送袁太祝尉豫章」孟浩然

何幸遇休明，觀光來上京。相逢武陵客，獨送豫章行。隨牒牽黃綬，離群會墨卿。江南佳麗地，山水舊難名。

「都下送辛大之鄂」孟浩然

南國辛居士，言歸舊竹林。未逢調鼎用，徒有濟川心。予亦忘機者，田園在漢陰。因君故鄉去，遙寄式微吟。

「送席大」孟浩然

惜爾懷其寶，迷邦倦客遊。江山曆全楚，河洛越成周。道路疲千里，鄉園老一丘。知君命不偶，同病亦同憂。

「送賈升主簿之荊府」孟浩然

奉使推能者，勤王不暫閑。觀風隨按察，乘騎度荊關。送別登何處，開筵舊峴山。征軒明日遠，空望郢門間。

「送王大校書」孟浩然

導漾自蟠塚，東流為漢川。維桑君有意，解纜我開筵。云雨從茲別，林端意渺然。尺書能不吝，時望鯉魚傳。

「游江西留別富陽裴、劉二少府」孟浩然

西上游江西，臨流恨解攜。千山疊成嶂，萬水瀉為溪。石淺流難溯，藤長險易躋。誰憐問津者，歲晏此中迷。

「廣陵別薛八（一題作送友東歸）」孟浩然

士有不得志，棲棲吳楚間。廣陵相遇罷，彭蠡泛舟還。檣出江中樹，波連海上山。風帆明日遠，何處更追攀。

「送洗然弟進士舉」孟浩然

獻策金門去，承歡彩服違。以吾一日長，念爾聚星稀。昏定須溫席，寒多未授衣。桂枝如已擢，早逐雁南飛。

「崔明府宅夜觀妓」孟浩然

白日既云暮，朱顏亦已酡。畫堂初點燭，金幌半垂羅。長袖平陽曲，新聲子夜歌。從來慣留客，茲夕為誰多。

「同盧明府早秋宴張郎中海亭」孟浩然

側聽弦歌宰，文書游夏徒。故園欣賞竹，為邑幸來蘇。華省曾聯事，仙舟復與俱。欲知臨泛久，荷露漸成珠。

「盧明府早秋宴張郎中海園即事，得秋字（一作盧象詩）」孟浩然

邑有弦歌宰，翔鸞狎野鷗。眷言華省舊，暫拂海池遊。郁島藏深竹，前溪對舞樓。更聞書即事，云物是清秋。

「宴榮二山池（一題作宴榮山人池亭）」孟浩然

甲第開金穴，榮期樂自多。櫺嘶支遁馬，池養右軍鵝。竹引攜琴入，花邀載酒過。山公來取醉，時唱接 z5 歌。

「夏日與崔二十一同集衛明府宅（一作宴衛明府宅遇北使）」孟浩然

言避一時暑，池亭五月開。喜逢金馬客，同飲玉人杯。舞鶴乘軒至，遊魚擁釣來。座中殊未起，簫管莫相催。

「清明日宴梅道士房」孟浩然

林臥愁春盡，開軒覽物華。忽逢青鳥使，邀入赤松家。丹灶初開火，仙桃正落花。童顏若可駐，何惜醉流霞。

「寒夜張明府宅宴」孟浩然

瑞雪初盈尺，寒宵始半更。列筵邀酒伴，刻燭限詩成。香炭金爐暖，嬌弦玉指清。醉來方欲臥，不覺曉雞鳴。

「宴張別駕新齋」孟浩然

世業傳珪組，江城佐股肱。高齋征學問，虛薄濫先登。講論陪諸子，文章得舊朋。士元多賞激，衰病恨無能。

「與諸子登峴山」孟浩然

人事有代謝，往來成古今。江山留勝跡，我輩復登臨。水落魚梁淺，天寒夢澤深。羊公碑字在，讀罷淚沾襟。

「與杭州薛司戶登樟亭樓作」孟浩然

水樓一登眺，半出青林高。帟幕英僚敞，芳筵下客叨。山藏伯禹穴，城壓伍胥濤。今日觀溟漲，垂綸學釣鼇。

「尋天臺山」孟浩然

吾友太乙子，餐霞臥赤城。欲尋華頂去，不憚惡溪名。歇馬憑云宿，揚帆截海行。高高翠微裏，遙見石梁橫。

「同曹三御史行泛湖歸越」孟浩然

秋入詩人意，巴歌和者稀。泛湖同逸旅，吟會是思歸。白簡徒推薦，滄洲已拂衣。杳冥云外去，誰不羨鴻飛。

「晚泊潯陽望廬山」孟浩然

掛席幾千里，名山都未逢。泊舟潯陽郭，始見香爐峰。嘗讀遠公傳，永懷塵外蹤。東林精舍近，日暮但聞鐘。

「陪張丞相登嵩陽樓」孟浩然

獨步人何在，嵩陽有故樓。歲寒問耆舊，行縣擁諸侯。林莽北彌望，沮漳東會流。客中遇知己，無復越鄉憂。

「武陵泛舟」孟浩然

武陵川路狹，前棹入花林。莫測幽源裏，仙家信幾深。水回青嶂合，云度綠溪陰。坐聽閑猿嘯，彌清塵外心。

「與顏錢塘登障樓望潮作」孟浩然

百里聞雷震，鳴弦暫輟彈。府中連騎出，江上待潮觀。照日秋云迴，浮天渤澥寬。驚濤來似雪，一坐凜生寒。

「姚開府山池」孟浩然

主人新邸第，相國舊池台。館是招賢辟，樓因教舞開。軒車人已散，簫管鳳初來。今日龍門下，誰知文學才。

「夏日浮舟過陳大水亭（一作浮舟過滕逸人別業）」孟浩然

水亭涼氣多，閑棹晚來過。澗影見松竹，潭香聞芰荷。野童扶醉舞，山鳥助酣歌。幽賞未云遍，煙光奈夕何。

「與白明府游江」孟浩然

故人來自遠，邑宰復初臨。執手恨為別，同舟無異心。沿洄洲渚趣，演漾弦歌音。誰識躬耕者，年年梁甫吟。

「游鳳林寺西嶺」孟浩然

共喜年華好，來游水石間。煙容開遠樹，春色滿幽山。壺酒朋情洽，琴歌野興閑。莫愁歸路暝，招月伴人還。

「秋日陪李侍禦渡松滋江」孟浩然

南紀西江闊，皇華禦史雄。截流寧假楫，掛席自生風。僚寀爭攀鷁，魚龍亦避驄。坐聽白雪唱，翻入棹歌中。

「陪獨孤使君同與蕭員外證登萬山亭」孟浩然

萬山青嶂曲，千騎使君遊。神女鳴環佩，仙郎接獻酬。遍觀云夢野，自愛江城樓。何必東南守，空傳沈隱侯。

「秋登張明府海亭」孟浩然

海亭秋日望，委曲見江山。染翰聊題壁，傾壺一解顏。歌逢彭澤令，歸賞故園間。予亦將琴史，棲遲共取閑。

「臨渙裴明府席遇張十一、房六」孟浩然

河縣柳林邊，河橋晚泊船。文叨才子會，官喜故人連。笑語同今夕，輕肥異往年。晨風理歸棹，吳楚各依然。

「梅道士水亭」孟浩然

傲吏非凡吏，名流即道流。隱居不可見，高論莫能酬。水接仙源近，山藏鬼穀幽。再來迷處所，花下問漁舟。

「游景空寺蘭若」孟浩然

龍象經行處，山腰度石關。屢迷青嶂合，時愛綠蘿閑。宴息花林下，高談竹嶼間。
寥寥隔塵事，疑是入雞山。

「陪李侍禦訪聰上人禪居（一作陪柏台友訪聰上人）」孟浩然
欣逢柏台友，共謁聰公禪。石室無人到，繩床見虎眠。陰崖常抱雪，枯澗為生泉。
出處雖云異，同歡在法筵。

「遊精思觀回，王白云在後」孟浩然
出穀未停午，到家日已曛。回瞻下山路，但見牛羊群。樵子暗相失，草蟲寒不聞。
衡門猶未掩，佇立望夫君。

「夏日辨玉法師茅齋」孟浩然
夏日茅齋裏，無風坐亦涼。竹林深筍穢，藤架引梢長。燕覓巢窠處，蜂來造蜜房。
物華皆可玩，花蕊四時芳。

「與張折冲遊耆闍寺」孟浩然
釋子彌天秀，將軍武庫才。橫行塞北盡，獨步漢南來。貝葉傳金口，山樓作賦開。
因君振嘉藻，江楚氣雄哉。

「遊精思，題觀主山房」孟浩然
誤入桃源裏，初憐竹徑深。方知仙子宅，未有世人尋。舞鶴過閑砌，飛猿嘯密林。
漸通玄妙理，深得坐忘心。

「宿立公房」孟浩然
支遁初求道，深公笑買山。何如石岩趣，自入戶庭間。苔澗春泉滿，蘿軒夜月閑。
能令許玄度，吟臥不知還。

「尋陳逸人故居」孟浩然
人事一朝盡，荒蕪三徑休。始聞漳浦臥，奄作岱宗遊。池水猶含墨，風云已落秋。
今宵泉壑裏，何處覓藏舟。

「尋梅道士（一作尋梅道士張山人）」孟浩然
彭澤先生柳，山陰道士鵝。我來從所好，停策漢陰多。重以觀魚樂，因之鼓枻歌。
崔徐跡未朽，千載揖清波。

「陪姚使君題惠上人房」孟浩然
帶雪梅初暖，含煙柳尚青。來窺童子偈，得聽法王經。會理知無我，觀空厭有形。
迷心應覺悟，客思未遑寧。

「晚春題遠上人南亭」孟浩然

給園支遁隱，虛寂養身和。春晚群木秀，間關黃鳥歌。林棲居士竹，池養右軍鵝。炎月北窗下，清風期再過。

「題大禹寺義公禪房」孟浩然

義公習禪處，結構依空林。戶外一峰秀，階前群壑深。夕陽連雨足，空翠落庭陰。看取蓮花淨，應知不染心。

「尋白鶴岩張子容隱居」孟浩然

白鶴青岩半，幽人有隱居。階庭空水石，林壑罷樵漁。歲月青松老，風霜苦竹疏。睹茲懷舊業，回策返吾廬。

「題融公蘭若（一作題容山主蘭若）」孟浩然

精舍買金開，流泉繞砌回。芰荷薰講席，松柏映香台。法雨晴飛去，天花晝下來。談玄殊未已，歸騎夕陽催。

「過景空寺故融公蘭若（或作過潛上人舊房、悼正弘禪師）」孟浩然

池上青蓮宇，林間白馬泉。故人成異物，過客獨潸然。既禮新松塔，還尋舊石筵。平生竹如意，猶掛草堂前。

「題張野人園廬」孟浩然

與君園廬並，微尚頗亦同。耕釣方自逸，壺觴趣不空。門無俗士駕，人有上皇風。何處先賢傳，惟稱龐德公。

「李少府與楊九再來」孟浩然

弱歲早登龍，今來喜再逢。如何春月柳，猶憶歲寒松。煙火臨寒食，笙歌達曙鐘。喧喧鬥雞道，行樂羨朋從。

「尋張五回夜園作」孟浩然

聞就龐公隱，移居近澗湖。興來林是竹，歸臥穀名愚。掛席樵風便，開軒琴月孤。歲寒何用賞，霜落故園蕪。

「裴司士、員司戶見尋（一題作裴司士見訪）」孟浩然

府僚能枉駕，家醞複新開。落日池上酌，清風松下來。廚人具雞黍，稚子摘楊梅。誰道山公醉，猶能騎馬回。

卷「春中喜王九相尋（一題作晚春）」孟浩然

二月湖水清，家家春鳥鳴。林花掃更落，徑草踏還生。酒伴來相命，開尊共解醒。當杯已入手，歌妓莫停聲。

「李氏園林臥疾」孟浩然

我愛陶家趣，園林無俗情。春雷百卉坼，寒食四鄰清。伏枕嗟公幹，歸山羨子平。年年白社客，空滯洛陽城。

「過故人莊」孟浩然

故人具雞黍，邀我至田家。綠樹村邊合，青山郭外斜。開筵面場圃，把酒話桑麻。待到重陽日，還來就菊花。

「張七及辛大見尋南亭醉作（一作張七及辛大見訪）」孟浩然

山公能飲酒，居士好彈箏。世外交初得，林中契已並。納涼風颯至，逃暑日將傾。便就南亭裏，餘尊惜解醒。

「歲暮歸南山（一題作歸故園作，一作歸終南山）」孟浩然

北闕休上書，南山歸敝廬。不才明主棄，多病故人疏。白髮催年老，青陽逼歲除。永懷愁不寐，松月夜窗虛。

「南山下與老圃期種瓜」孟浩然

樵牧南山近，林閭北郭賒。先人留素業，老圃作鄰家。不種千株橘，惟資五色瓜。邵平能就我，開徑剪蓬麻。

「溯江至武昌」孟浩然

家本洞湖上，歲時歸思催。客心徒欲速，江路苦躑回。殘凍因風解，新正度臘開。行看武昌柳，仿佛映樓臺。

「舟中曉望」孟浩然

掛席東南望，青山水國遙。舳舻爭利涉，來往接風潮。問我今何去，天臺訪石橋。坐看霞色曉，疑是赤城標。

「自洛之越」孟浩然

皇皇三十載，書劍兩無成。山水尋吳越，風塵厭洛京。扁舟泛湖海，長揖謝公卿。且樂杯中物，誰論世上名。

「途中遇晴」孟浩然

已失巴陵雨，猶逢蜀阪泥。天開斜景遍，山出晚云低。餘濕猶沾草，殘流尚入溪。今宵有明月，鄉思遠淒淒。

「歸至郢中」孟浩然

遠遊經海嶠，返棹歸山阿。日夕見喬木，鄉關在伐柯。愁隨江路盡，喜入郢門多。左右看桑土，依然即匪他。

「夕次蔡陽館」孟浩然

日暮馬行疾，城荒人住稀。聽歌知近楚，投館忽如歸。魯堰田疇廣，章陵氣色微。明朝拜嘉慶，須著老萊衣。

「他鄉七夕」孟浩然

他鄉逢七夕，旅館益羈愁。不見穿針婦，空懷故國樓。緒風初減熱，新月始臨秋。誰忍窺河漢，迢迢問鬥牛。

「夜泊牛渚，趁薛八船不及」孟浩然

星羅牛渚夕，風退鷁舟遲。浦溆嘗同宿，煙波忽間之。榜歌空裏失，船火望中疑。明發泛潮海，茫茫何處期。

「曉入南山」孟浩然

瘴氣曉氛氳，南山複水云。鯤飛今始見，鳥墜舊來聞。地接長沙近，江從汨渚分。賈生曾吊屈，予亦痛斯文。

「夜渡湘水（一作崔國輔詩）」孟浩然

客舟貪利涉，暗裏渡湘川。露氣聞芳杜，歌聲識採蓮。榜人投岸火，漁子宿潭煙。行侶時相問，潯陽何處邊。

「赴京途中遇雪」孟浩然

迢遞秦京道，蒼茫歲暮天。窮陰連晦朔，積雪滿山川。落雁迷沙渚，饑鳥集野田。客愁空佇立，不見有人煙。

「途次望鄉」孟浩然

客行愁落日，鄉思重相催。況在他山外，天寒夕鳥來。雪深迷郢路，云暗失陽臺。可歎淒惶子，高歌誰為媒。

「永嘉上浦館逢張八子容（一題作永嘉浦逢張子容客卿）」孟浩然

逆旅相逢處，江村日暮時。眾山遙對酒，孤嶼共題詩。廨宇鄰蛟室，人煙接島夷。鄉園萬餘裏，失路一相悲。

「宿武陽即事（一作宿武陽川）」孟浩然

川暗夕陽盡，孤舟泊岸初。嶺猿相叫嘯，潭嶂似空虛。就枕滅明燭，扣舷聞夜漁。雞鳴問何處，人物是秦餘。

「渡揚子江」孟浩然

桂楫中流望，京江兩畔明。林開揚子驛，山出潤州城。海盡邊陰靜，江寒朔吹生。更聞楓葉下，淅瀝度秋聲。

「田家元日」孟浩然

昨夜鬥回北，今朝歲起東。我年已強仕，無祿尚憂農。桑野就耕父，荷鋤隨牧童。田家占氣候，共說此年豐。

「九日得新字」孟浩然

初九未成旬，重陽即此晨。登高聞古事，載酒訪幽人。落帽恣歡飲，授衣同試新。茱萸正可佩，折取寄情親。

「除夜樂城逢張少府」孟浩然

云海泛甌閩，風潮泊島濱。何知歲除夜，得見故鄉親。餘是乘槎客，君為失路人。平生複能幾，一別十餘春。

「歲除夜會樂城張少府宅」孟浩然

疇昔通家好，相知無間然。續明催畫燭，守歲接長筵。舊曲梅花唱，新正柏酒傳。客行隨處樂，不見度年年。

「寒夜」孟浩然

閨夕綺窗閉，佳人罷縫衣。理琴開寶匣，就枕臥重幃。夜久燈花落，薰籠香氣微。錦衾重自暖，遮莫曉霜飛。

「賦得盈盈樓上女」孟浩然

夫婿久離別，青樓空望歸。妝成捲簾坐，愁思懶縫衣。燕子家家入，楊花處處飛。空床難獨守，誰為報金徽。

「春意（一題作春怨）」孟浩然

佳人能畫眉，妝罷出簾帷。照水空自愛，折花將遺誰。春情多豔逸，春意倍相思。愁心極楊柳，一種亂如絲。

「閨情」孟浩然

一別隔炎涼，君衣忘短長。裁縫無處等，以意付情量。畏瘦疑傷窄，防寒更厚裝。半啼封裹了，知欲寄誰將。

「美人分香」孟浩然

豔色本傾城，分香更有情。髻鬟垂欲解，眉黛拂能輕。舞學平陽態，歌翻子夜聲。春風狹斜道，含笑待逢迎。

「傷峴山云表觀主」孟浩然

少小學書劍，秦吳多歲年。歸來一登眺，陵谷尚依然。豈意餐霞客，湓隨朝露先。因之問閭裏，把臂幾人全。

「題梧州陳司馬山齋（一作宋之問詩）」孟浩然

南國無霜霰，連年對物華。青林暗換葉，紅蕊亦開花。春去無山鳥，秋來見海槎。流芳雖可悅，會自泣長沙。

「歲除夜有懷（一題作除夜）」孟浩然

迢遞三巴路，羈危萬里身。亂山殘雪夜，孤燭異鄉人。漸與骨肉遠，轉于奴僕親。那堪正飄泊，來日歲華新。

「登安陽城樓」孟浩然

縣城南面漢江流，江漲開成南雍州。才子乘春來騁望，群公暇日坐銷憂。樓臺晚映青山郭，羅綺晴驕綠水洲。向夕波搖明月動，更疑神女弄珠游。

「登萬歲樓」孟浩然

萬歲樓頭望故鄉，獨令鄉思更茫茫。天寒雁度堪垂淚，日落猿啼欲斷腸。曲引古堤臨凍浦，斜分遠岸近枯楊。今朝偶見同袍友，卻喜家書寄八行。

「除夜有懷」孟浩然

五更鐘漏欲相催，四氣推遷往復回。帳裏殘燈才去焰，爐中香氣盡成灰。漸看春逼芙蓉枕，頓覺寒銷竹葉杯。守歲家家應未臥，相思那得夢魂來。

「春情」孟浩然

青樓曉日珠簾映，紅粉春妝寶鏡催。已厭交歡憐枕席，相將遊戲繞池台。坐時衣帶縈纖草，行即裙裾掃落梅。更道明朝不當作，相期共鬥管弦來。

「長安早春（一作張子容詩）」孟浩然

關戍惟東井，城池起北辰。咸歌太平日，共樂建寅春。雪盡青山樹，冰開黑水濱。草迎金埽馬，花伴玉樓人。鴻漸看無數，鶯歌聽欲頻。何當遂榮擢，歸及柳條新。

「荊門上張丞相」孟浩然

共理分荊國，招賢愧不材。召南風更闡，丞相閣還開。觀止欣眉睫，沉淪拔草萊。
坐登徐孺榻，頻接李膺杯。

始慰蟬鳴柳，俄看雪間梅。四時年籥盡，千里客程催。日下瞻歸翼，沙邊厭曝鰓。
佇聞宣室召，星象列三台。

「陪張丞相登荊城樓，因寄薊州張使君及浪泊戍主劉家」孟浩然

薊門天北畔，銅柱日南端。出守聲彌遠，投荒法未寬。側身聊倚望，攜手莫同歡。

白璧無瑕玷，青松有歲寒。府中丞相閣，江上使君灘。興盡回舟去，方知行路難。

「陪張丞相祠紫蓋山，途經玉泉寺」孟浩然

望秩宣王命，齋心待漏行。青衿列胄子，從事有參卿。五馬尋歸路，雙林指化城。
聞鐘度門近，照膽玉泉清。

皂蓋依松憩，緇徒擁錫迎。天宮上兜率，沙界豁迷明。欲就終焉志，恭聞智者名。
人隨逝水沒，波逐覆舟傾。

想像若在眼，周流空複情。謝公還欲臥，誰與濟蒼生。

「陪張丞相自松滋江東泊渚宮」孟浩然

放溜下松滋，登舟命楫師。詎忘經濟日，不憚沍寒時。洗幘豈獨古，濯纓良在茲。
政成人自理，機息鳥無疑。

云物凝孤嶼，江山辨四維。晚來風稍急，冬至日行遲。臘響驚云夢，漁歌激楚辭。
渚宮何處是，川暝欲安之。

「和張判官登萬山亭，因贈洪府都督韓公」孟浩然

韓公是襄士，日賞城西岑。結構意不淺，岩潭趣轉深。皇華一動詠，荊國幾謠吟。
舊徑蘭勿剪，新堤柳欲陰。

砌傍餘怪石，沙上有閑禽。自牧豫章郡，空瞻楓樹林。因聲寄流水，善聽在知音。
耆舊眇不接，崔徐無處尋。

物情多貴遠，賢俊豈無今。遲爾長江暮，澄清一洗心。

「和宋太史北樓新亭」孟浩然

返耕意未遂，日夕登城隅。誰道山林近，坐為符竹拘。麗譙非改作，軒檻是新圖。

遠水自嵒塚，長云吞具區。願隨江燕賀，羞逐府僚趨。欲識狂歌者，丘園一豎儒。

「贈蕭少府」孟浩然

上德如流水，安仁道若山。聞君秉高節，而得奉清顏。鴻漸升儀羽，牛刀列下班。

處腴能不潤，居劇體常閑。去詐人無諂，除邪吏息奸。欲知清與潔，明月照澄灣。

「秦中苦雨思歸，贈袁左丞、賀侍郎」孟浩然

苦學三十載，閉門江漢陰。用賢遭聖日，羈旅屬秋霖。豈直昏墊苦，亦為權勢沈。二毛催白髮，百鎰罄黃金。

淚憶峴山墮，愁懷湘水深。謝公積憤懣，莊舄空謠吟。躍馬非吾事，狎鷗宜我心。寄言當路者，去矣北山岑。

「同張明府碧溪贈答」孟浩然

別業聞新制，同聲和者多。還看碧溪答，不羨綠珠歌。自有陽臺女，朝朝拾翠過。綺筵鋪錦繡，妝牖閉藤蘿。

秩滿休閒日，春餘景氣和。仙覺能作伴，羅襪共凌波。曲島尋花藥，回潭折芰荷。更憐斜日照，紅粉豔青娥。

「久滯越中，貽謝南池、會稽賀少府」孟浩然

陳平無產業，尼父倦東西。負郭昔云翳，問津今亦迷。未能忘魏闕，空此滯秦稽。

兩見夏云起，再聞春鳥啼。懷仙梅福市，訪舊若耶溪。聖主賢為寶，君何隱遁棲。

「送韓使君除洪州都曹（韓公父常為襄州使）」孟浩然

述職撫荊衡，分符襲寵榮。往來看擁傳，前後賴專城。勿翦棠猶在，波澄水更清。重推江漢理，旋改豫章行。

召父多遺愛，羊公有令名。衣冠列祖道，耆舊擁前旌。峴首晨風送，江陵夜火迎。無才慚孺子，千里愧同聲。

「送莫甥兼諸昆弟從韓司馬入西軍」孟浩然

念爾習詩禮，未曾違戶庭。平生早偏露，萬里更飄零。坐棄三牲養，行觀八陣形。

飾裝辭故里，謀策赴邊庭。壯志吞鴻鵠，遙心伴鶴鷄。所從文且武，不戰自應寧。

「峴山送蕭員外之荊州」孟浩然

峴山江岸曲，郢水郭門前。自古登臨處，非今獨黯然。亭樓明落照，井邑秀通川。

澗竹生幽興，林風入管弦。再飛鵬激水，一舉鶴沖天。佇立三荊使，看君駟馬旋。

「送王昌齡之嶺南」孟浩然

洞庭去遠近，楓葉早驚秋。峴首羊公愛，長沙賈誼愁。土毛無縞紵，鄉味有槎頭。

已抱沈痼疾，更貽魑魅憂。數年同筆硯，茲夕間衾裯。意氣今何在，相思望鬥牛。

「峴山送張去非遊巴東（一題作峴山亭送朱大）」孟浩然

峴山南郭外，送別每登臨。沙岸江村近，松門山寺深。一言予有贈，三峽爾將尋。

祖席宜城酒，征途云夢林。蹉跎遊子意，眷戀故人心。去矣勿淹滯，巴東猿夜吟。

「奉先張明府休沐還鄉，海亭宴集（探得階字）」孟浩然

自君理畿甸，予亦經江淮。萬里書信斷，數年云雨乖。歸來休浣日，始得賞心諧。

朱紱恩雖重，滄洲趣每懷。樹低新舞閣，山對舊書齋。何以發秋興，陰蟲鳴夜階。

「宴張記室宅」孟浩然

甲第金張館，門庭車騎多。家封漢陽郡，文會楚材過。曲島浮觴酌，前山人詠歌。

妓堂花映發，書閣柳逶迤。玉指調箏柱，金泥飾舞羅。寧知書劍者，歲月獨蹉跎。

「宴崔明府宅夜觀妓」孟浩然

畫堂觀妙妓，長夜正留賓。燭吐蓮花豔，妝成桃李春。髻鬟低舞席，衫袖掩歌唇。

汗濕偏宜粉，羅輕詎著身。調移箏柱促，歡會酒杯頻。倘使曹王見，應嫌洛浦神。

「盧明府九日峴山宴袁使君、張郎中、崔員外」孟浩然

宇宙誰開闢，江山此鬱盤。登臨今古用，風俗歲時觀。地理荊州分，天涯楚塞寬。百城今刺史，華省舊郎官。

共美重陽節，俱懷落帽歡。酒邀彭澤載，琴輟武城彈。獻壽先浮菊，尋幽或藉蘭。煙虹鋪藻翰，松竹掛衣冠。

叔子神如在，山公興未闌。傳聞騎馬醉，還向習池看。

「登龍興寺閣」孟浩然

閣道乘空出，披軒遠日開。逶迤見江勢，客至屢緣回。茲郡何填委，遙山復幾哉。
蒼蒼皆草木，處處盡樓臺。驟雨一陽散，行舟四海來。鳥歸餘興遠，周覽更裴回。

「登總持寺浮圖」孟浩然

半空躋寶塔，晴望盡京華。竹繞渭川遍，山連上苑斜。四門開帝宅，阡陌俯人家。
累劫從初地，為童憶聚沙。一窺功德見，彌益道心加。坐覺諸天近，空香送落花。

「與崔二十一遊鏡湖，寄包、賀二公」孟浩然

試覽鏡湖物，中流到底清。不知鱸魚味，但識鷗鳥情。帆得樵風送，春逢穀雨晴。
將探夏禹穴，稍背越王城。府掾有包子，文章推賀生。滄浪醉後唱，因此寄同聲。

「夜登孔伯昭南樓，時沈太清、朱升在座」孟浩然

誰家無風月，此地有琴尊。山水會稽郡，詩書孔氏門。再來值秋杪，高閣夜無喧。
華燭罷然蠟，清弦方奏鶉。沈生隱侯胤，朱子買臣孫。好我意不淺，登茲共話言。

「陪盧明府泛舟回作」孟浩然

百里行春返，清流逸興多。鷁舟隨雁泊，江火共星羅。已救田家旱，仍醫俗化訛。
文章推後輩，風雅激頽波。高岸迷陵穀，新聲滿棹歌。猶憐不才子，白首未登科。

「臘月八日於剡縣石城寺禮拜」孟浩然

石壁開金像，香山倚鐵圍。下生彌勒見，回向一心歸。竹柏禪庭古，樓臺世界稀。
夕嵐增氣色，餘照發光輝。講席邀談柄，泉堂施浴衣。願承功德水，從此濯塵機。

「同獨孤使君東齋作」孟浩然

郎官舊華省，天子命分憂。襄土歲頻旱，隨車雨再流。云陰自南楚，河潤及東周。
廨宇宜新霽，田家賀有秋。竹間殘照入，池上夕陽浮。寄謝東陽守，何如八詠樓。

「同王九題就師山房」孟浩然

晚憩支公室，故人逢右軍。軒窗避炎暑，翰墨動新文。竹蔽簷前日，雨隨階下云。

周遊清蔭遍，吟臥夕陽曛。江靜棹歌歇，溪深樵語聞。歸途未忍去，攜手戀清芬。

「冬至後過吳、張二子檀溪別業」孟浩然

卜築因自然，檀溪不更穿。園廬二友接，水竹數家連。直與南山對，非關選地偏。草堂時偃曝，蘭枻日周旋。

外事情都遠，中流性所便。閑垂太公釣，興發子猷船。餘亦幽棲者，經過竊慕焉。梅花殘臘月，柳色半春天。

鳥泊隨陽雁，魚藏縮項鱖。停杯問山簡，何似習池邊。

「韓大使東齋會岳上人、諸學士」孟浩然

郡守虛陳榻，林間召楚材。山川祈雨畢，云物喜晴開。抗禮尊縫掖，臨流揖渡杯。

徒攀朱仲李，誰薦和羹梅。翰墨緣情制，高深以意裁。滄洲趣不遠，何必問蓬萊。

「上巳日澗南園期王山人、陳七諸公不至」孟浩然

搖艇候明發，花源弄晚春。在山懷綺季，臨漢憶荀陳。上巳期三月，浮杯興十旬。坐歌空有待，行樂恨無鄰。

日晚蘭亭北，煙開曲水濱。浴蠶逢姹女，采艾值幽人。石壁堪題序，沙場好解紳。群公望不至，虛擲此芳晨。

「齒坐呈山南諸隱」孟浩然

習公有遺坐，高在白云陲。樵子不見識，山僧賞自知。以餘為好事，攜手一來窺。

竹露閑夜滴，松風清晝吹。從來抱微尚，況復感前規。於此無奇策，蒼生奚以為。

「來闍黎新亭作」孟浩然

八解禪林秀，三明給苑才。地偏香界遠，心淨水亭開。傍險山查立，尋幽石徑回。瑞花長自下，靈藥豈須栽。

碧網交紅樹，清泉盡綠苔。戲魚聞法聚，閑鳥誦經來。棄象玄應悟，忘言理必該。靜中何所得，吟詠也徒哉。

「西山尋辛諤」孟浩然

漾舟尋水便，因訪故人居。落日清川裏，誰言獨羨魚。石潭窺洞徹，沙岸曆紆徐。

竹嶼見垂釣，茅齋聞讀書。款言忘景夕，清興屬涼初。回也一瓢飲，賢哉常晏如。

「題長安主人壁」孟浩然

久廢南山田，叨陪東閣賢。欲隨平子去，猶未獻甘泉。枕籍琴書滿，褰帷遠岫連。

我來如昨日，庭樹忽鳴蟬。促織驚寒女，秋風感長年。授衣當九月，無褐竟誰憐。

「行出東山望漢川（一題作行至漢川作）」孟浩然

異縣非吾土，連山盡綠篁。平田出郭少，盤阪入云長。萬壑歸於漢，千峰劃彼蒼。猿聲亂楚峽，人語帶巴鄉。

石上攢椒樹，藤間綴蜜房。雪餘春未暖，嵐解晝初陽。征馬疲登頓，歸帆愛渺茫。坐欣沿溜下，信宿見維桑。

「夜泊宣城界（一題作旅行欲泊宣州界）」孟浩然

西塞沿江島，南陵問驛樓。湖平津濟闊，風止客帆收。去去懷前浦，茫茫泛夕流。

石逢羅剎礙，山泊敬亭幽。火識梅根冶，煙迷楊葉洲。離家複水宿，相伴賴沙鷗。

「下贛石」孟浩然

贛石三百里，沿洄千嶂間。沸聲常活活，洑勢亦潺潺。跳沫魚龍沸，垂藤猿狖攀。

榜人苦奔峭，而我忘險艱。放溜情彌愜，登艫目自閑。暝帆何處宿，遙指落星灣。

「初年樂城館中臥疾懷歸作」孟浩然

異縣天隅僻，孤帆海畔過。往來鄉信斷，留滯客情多。臘月聞雷震，東風感歲和。

蟄蟲驚戶穴，巢鷓眄庭柯。徒對芳尊酒，其如伏枕何。歸嶼理舟楫，江海正無波。

「醉後贈馬四」孟浩然

四海重然諾，吾嘗聞白眉。秦城游俠客，相得半酣時。

「贈王九」孟浩然

日暮田家遠，山中勿久淹。歸人須早去，稚子望陶潛。

「登峴山亭，寄晉陵張少府」孟浩然
峴首風湍急，云帆若鳥飛。憑軒試一問，張翰欲來歸。

「送朱大入秦」孟浩然
遊人武陵去，寶劍直千金。分手脫相贈，平生一片心。

「送友人之京」孟浩然
君登青雲去，予望青山歸。雲山從此別，淚濕薜蘿衣。

「送張郎中遷京」孟浩然
碧溪常共賞，朱邸忽遷榮。豫有相思意，聞君琴上聲。

「同張將薊門觀燈」孟浩然
異俗非鄉俗，新年改故年。薊門看火樹，疑是燭龍燃。

「張郎中梅園中」孟浩然
綺席鋪蘭杜，珠盤折芰荷。故園留不住，應是戀弦歌。

「北澗泛舟」孟浩然
北澗流恒滿，浮舟觸處通。沿洄自有趣，何必五湖中。

「春曉」孟浩然
春眠不覺曉，處處聞啼鳥。夜來風雨聲，花落知多少。

「洛中訪袁拾遺不遇」孟浩然
洛陽訪才子，江嶺作流人。聞說梅花早，何如北地春。

「尋菊花潭主人不遇」孟浩然
行至菊花潭，村西日已斜。主人登高去，雞犬空在家。

「檀溪尋故人（一題作檀溪尋古）」孟浩然
花伴成龍竹，池分躍馬溪。田園人不見，疑向洞中棲。

「揚子津望京口」孟浩然
北固臨京口，夷山近海濱。江風白浪起，愁殺渡頭人。

「同儲十二洛陽道中作」孟浩然
珠彈繁華子，金羈遊俠人。酒酣白日暮，走馬入紅塵。

「初下浙江舟中口號」孟浩然

八月觀潮罷，三江越海濤。回瞻魏闕路，空複子牟心。

「宿建德江」孟浩然

移舟泊煙渚，日暮客愁新。野曠天低樹，江清月近人。

「問舟子」孟浩然

向夕問舟子，前程複幾多。灣頭正堪泊，淮裏足風波。

「戲題（一作戲贈主人）」孟浩然

客醉眠未起，主人呼解醒。已言雞黍熟，複道甕頭清。

「涼州詞」孟浩然

渾成紫檀金屑文，作得琵琶聲入云。胡地迢迢三萬里，那堪馬上送明君。
異方之樂令人悲，羌笛胡笳不用吹。坐看今夜關山月，思殺邊城遊俠兒。

「送新安張少府歸秦中（一題作越中送人歸秦中）」孟浩然

試登秦嶺望秦川，遙憶青門春可憐。仲月送君從此去，瓜時須及邵平田。

「送杜十四之江南（一題作送杜晃進士之東吳）」孟浩然

荊吳相接水為鄉，君去春江正淼茫。日暮征帆何處泊，天涯一望斷人腸。

「渡浙江問舟中人（一題作濟江問同舟人。一作崔國輔詩）」孟浩然

潮落江平未有風，扁舟共濟與君同。時時引領望天末，何處青山是越中。

「初秋」孟浩然

不覺初秋夜漸長，清風習習重淒涼。炎炎暑退茅齋靜，階下叢莎有露光。

「過融上人蘭若」孟浩然

山頭禪室掛僧衣，窗外無人水鳥飛。黃昏半在下山路，卻聽泉聲戀翠微。

「句」孟浩然

微云淡河漢，疏雨滴梧桐。逐逐懷良馭，蕭蕭顧樂鳴。（《省試騏驎長鳴》詩，見《丹陽集》）

全集字數：19,701